

### *Treguesit për caktimin e normës në % të shtesës kundërciklike të kapitalit (KUNC)*

Në përputhje me rregulloren “Për shtesat makroprudenciale të kapitalit” miratuar me vendimin nr.41, datë 05.06.2019 të Këshillit Mbikëqyrës të Bankës së Shqipërisë dhe udhëzimet e Bordit Evropian të Rrezikut Sistemik, për përcaktimin e normës së shtesës kundërciklike të kapitalit përdoren treguesit e referencës. Këta tregues synojnë të reflektojnë në mënyrë sa më të drejtë ciklin e kreditimit dhe rreziqet që shoqërojnë rritjen e tepërt të kreditimit në vend, si edhe të konsiderojnë në mënyrë të përshtatshme specifikat e ekonomisë së vendit. Vlerat sasiore të treguesve janë gjithmonë subjekt i interpretimit dhe analizës së ekspertëve të cilët në analizë mund të përfshijnë edhe faktorë të tjerë cilësorë.

Midis treguesve të referencës, si *tregues parësor* shërben “Hendeku i raportit të kredisë për ekonominë ndaj Prodhimit të Brendshëm Bruto (PBB)”, që paraqet devijimin e vlerës aktuale të raportit “Kredi për ekonominë/PBB” nga prirja e tij afatgjatë. Ky tregues sinjalizon mundësinë e rritjes së tepërt të kreditimit në raport me rritjen ekonomike dhe eventualisht, rritjen e rreziqeve sistemike ciklike. Si *plotësues* të treguesit parësor, shërbejnë disa nëntregues të tjerë të grupuar në indeksin e treguesit të paralajmërimit të hershëm (TPHP). Krahas treguesit parësor, ky tregues përbëhet edhe nga pesë nëntregues të tjerë, të cilët sinjalizojnë zhvillimet në kreditim dhe në aktivet jofinanciare (tregu i pasurive të paluajtshme).

### *Arsyetimi mbi caktimin e normës në % të KUNC*

Tabelat në vijim paraqesin vlerat më të fundit të disponueshme të treguesve të përzgjedhur dhe mesataret historike përkatëse.

Nga tabela 1, vërehet që shifra e treguesit parësor regjistron vlera negative dhe larg vlerave të pragut krahasues që, si rregull, do të shoqërohej me rritjen e normës së shtesës kundërciklike të kapitalit<sup>i</sup>. Vlera e treguesit është thelluar kundrejt të njëjtës periudhë një vit më parë dhe disi më pak ndaj tremujorit paraardhës.<sup>ii</sup>


*Tabelë 1. Treguesi parësor*

Treguesi parësor <sup>iii</sup>	Mesatarja historike		T1-2022
	T4-2002 : T4-2008	T1-2009 : T4-2021	
<i>Hendeku i kredisë për ekonominë ndaj PBB-së<sup>iv</sup></i>	1.9 pp	-7.9 pp	-7.16 pp <sup>v</sup>

*Burimi: Banka e Shqipërisë dhe INSTAT.*

Ky zhvillim reflekton ritmin më të lartë rritës të prodhimit të brendshëm bruto të vjetorizuar, kundrejt ritmit rritës të kredisë për ekonominë. Ecuria e këtij treguesi është e ndryshme për sektorët “biznes” dhe “individë”. Gjate periudhes se fundit, thellimi i vleres se treguesit duket se eshte percaktuar nga ecuria e treguesit per individet. Megjithate, ne afat te gjate vlera e treguesit parësor për individët priret me shpejt drejt nivelit “zero”, duke sinjalizuar nevojën për një vëmendje të shtuar.

*Grafik 1. Ecuria e hendekut të raportit “Kredi për ekonominë / PBB” në pikë përqindje*



Burimi: Banka e Shqipërisë.

Vendimarrja e Bankës së Shqipërisë mbi përcaktimin e normës së shtesës kundërciklike të kapitalit merr në konsideratë edhe ecurinë e TPHP. Ecuria e nëntregueve përbërës të tij paraqitet në tabelën në vijim. Zhvillimet e periudhës të treguesit plotësues vijnë të pasqyrojnë zgjerim të ritmit rritës të kredisë për pasuri të paluajtshme në terma tremujorë dhe vjetorë. Ndërkohë, indeksi i çmimit të banesave pavarësisht se regjistron sërish rënie kundrejt një viti më parë dhe periudhës paraardhëse, mbetet mbi vlerën e mesatares historike. Ecuria e këtyre dy nëntreguesve, të cilët priren të përforcojnë ecurinë e njëri-tjetrit, po monitorohet me kujdes. Qëllimi është që, duke përdorur edhe informacionet që lidhen me ngarkesën me borxh të familjeve, të identifikohen dhe parandalohen situatat në të cilat ecuria e çmimeve në tregun e pasurive të paluajtshme është e paqëndrueshme. E njëjta prirje rritëse, në terma vjetorë dhe tremujorë, vërehet edhe për nëntreguesin e intensitetit të kredisë për ekonominë.


*Tabelë 2. Treguesit plotësues*

Treguesit plotësues dhe indeksi TPHP	Mesatarja historike (T4-2002 : T4-2021)	T1-2022
Intensiteti i kredisë për ekonominë <sup>vi</sup>	3.0%	3.7%
Ndryshimi vjetor i kredisë bankare për pasuri të paluajtshme	21.1%	15.6%
Ndryshimi vjetor i indeksit të “çmim i banesave / vlera e qirasë” <sup>vii</sup>	8.0%	9.5%
Ndryshimi vjetor i indeksit të çmimit të banesave <sup>viii</sup>	5.5%	10.9%
Rritja vjetore e kredisë bankare <sup>ix</sup>	14.5%	12.8%
Indeksi TPHP* (pragu krahasues)	0.49	0.53

*Burimi: Banka e Shqipërisë dhe INSTAT.*

Vlera e indeksit TPHP, në fund të tremujorit të parë të vitit, qëndron mbi nivelin e pragut krahasues. Ky zhvillim, pavarësisht ecurisë së treguesit parësor, nëse vijon dhe fiton qendrueshmeri në periudhat në vijim, mund të sugjerojë nevojën për rritjen e normës së shtesës kundërciklike të kapitalit.

*Grafik 2. Ecuria e Treguesit të Paralajmërimit të Hershëm Plotësues.*



*Burimi: Banka e Shqipërisë.*

Mbështetur në të dhënat dhe analizën e treguesve të mësipërm, rezulton se, pavarësisht disa zhvillimeve në kreditim që kërkojnë monitorim të kujdesshëm, rreziqet që lidhen me kreditimin e tepërt mbeten ende në nivele të kontrolluara.

*Si rezultat norma e shtesës kundërciklike të kapitalit (KUNC) për Shqipërinë, propozohet të vijojë të jetë 0%.*

**SQARIME:**

<sup>i</sup> Rritja e shtesës kundërciklike të kapitalit mund të jetë e nevojshme edhe nëse vlerat e treguesit parësor janë më të vogla se pragu krahasues. Ky është rasti kur, pavarësisht ecurisë së kredisë në përgjithësi, vërehen zhvillime të shpejta të kreditimit në sektorë të caktuar, të cilat konsiderohen të paqëndrueshme dhe burim rreziku për qëndrueshmërinë e sistemit financiar dhe të tregjeve.

<sup>ii</sup> Vlera e treguesit parësor ishte: [-6.64] pp në T1-2021, [-7.08] pp në T2-2021, [-7.84] pp në T3-2021 dhe [-7.04] pp në T4-2021.

<sup>iii</sup> Në analizën e vlerave në tabelë, duhet konsideruar që vlerat e llogaritura të treguesit parësor dhe të mesatares së tij historike, ndryshojnë për shkak të dy grupeve të faktorëve: a) zhvillimeve në vlerat e kredisë për ekonominë dhe të PBB-së; dhe b) rishikimeve të vlerave të PBB-së, që kryen rregullisht Instituti i Statistikave (INSTAT). Këto dy grupe faktorësh mund të ndikojnë mbi vlerën e treguesit parësor, në të njëjtin kah ose në kahe të ndryshme.

<sup>iv</sup> Vlera e PBB-së është llogaritur si shuma e vlerave të katër tremujorëve të fundit. Për T1-2022, norma e rritjes reale të PBB-së është 5.97%. Vlera e rritjes ekonomike të periudhës mund të jetë subjekt rishikimi në periudhën pasardhëse nga INSTAT.

<sup>v</sup> Vlera e treguesit parësor për T1-2022 prej [-7.16] pp shënon një zgjerim (përkeqësim) të hendekut të kredisë në krahasim me vlerën e T1-2021 [-6.64]. Në këtë ndryshim ka ndikuar rritja më e lartë e produktit të brendshëm bruto të anualizuar kundrejt rritjes së kredisë për ekonominë.

<sup>vi</sup> Vlera absolute e rritjes vjetore të kredisë për ekonominë si raport ndaj vlerës së vjetorizuar të PBB-së (shuma e vlerave të PBB-së për katër tremujorët e fundit).

<sup>vii</sup> Vlerat e indeksit zbuten për 8 tremujorët e fundit. Në T4-2020, metodologjia e përlllogaritjes të indeksit të qirasë ka ndryshuar duke sjellë edhe ndryshimin e vlerës mesatare historike të tij.

<sup>viii</sup> Vlerat e indeksit zbuten për 8 tremujorët e fundit. Në T2-2019, metodologjia e ndërtimit të indeksit ka ndryshuar duke sjellë edhe ndryshimin e vlerës mesatare historike të tij.

<sup>ix</sup> I referohet totalit të kredisë së dhënë nga sektori bankar për sektorin publik dhe atë privat jofinanciar.

<sup>x</sup> Nëntreguesit individualë, së bashku me treguesin parësor, përbëjnë “Treguesin e Paralajmërimit të Hershëm Plotësues”. Treguesi është ndërtuar në trajtë indeksi dhe secili prej nëntreguesve ka të njëjtën peshë. Pragu krahasues për indeksin TPHP, është përcaktuar në nivelin 0.5. Për më shumë informacion, lutem referojuni metodologjisë “Për Shtesën Kundërciklike të Kapitalit:

[https://www.bankofalbania.org/Stabiliteti\\_Financiar/Politika\\_makroprudenciale/Instrumentet\\_e\\_politikes\\_makroprudenciale/Akte\\_te\\_miratuara/](https://www.bankofalbania.org/Stabiliteti_Financiar/Politika_makroprudenciale/Instrumentet_e_politikes_makroprudenciale/Akte_te_miratuara/).